

LOCAL

Betico Croes alma y curazon di nos Himno y Bandera

Pa semper tur celebracion di dia di Himno y Bandera lo ta ligá na tres personahe, lidernan político cu a cambia destino di nos país. Un lucha cu a iniciá serca Henny Eman y a haña mas contenido serca Juancho Irausquin y cual a keda coroná pa e determinacion y perserverancia di Betico Croes. Un lucha cu a para bira e orguyo di un pueblo cu semper a kere den su capacidad y den su integridad. E lucha aki a wordo coroná cu logro di un status aparte cu a habri caminda pa cambianan grandi den nos país.

Nos Himno y Bandera tabata inicio di e gran cambianan aki cualnan a keda introduci 17 aña pasá y cu ta keda celebrá tur 18 di Maart como un dia nacional.

Nos bandera Arubano a haña un toque special ora cu e gran lider Betico Croes a yega di pidi su pueblo, pa recohé e bandera y sigui cu e lucha pa libertad si algo pasa

cuné. E difunto lider di Aruba a bin logra e gran anhelo di su pueblo, cual tabata e status aparte.

E moral y insistencia di e lucha aki a bira e himno y bandera, cualnan a bira e sostén moral y spiritual di e lucha aki y cu a bira otro gran logro di Betico Croes. Su amor y orguyo demostrá pa e bandera y himno di Aruba, a pone cu den casi tur hogar na Aruba, nos colorman nacional a haña un acogida fenomenal.

ORGUYO NACIONAL

Dia 18 di Maart na 1976, dos dia despues cu Bestuurcollege di Aruba a aprobá e diseño di nos bandera, a tuma lugar un manifestacion cu a marca historia den Wilhelminastadion. Durante di un manifestacion masha emocional mes, Betico a duna contenido y amor na nos bandera y himno nacional. Su orguyo demostrá pa su lágrimanan di emocion a ser grabá pa eternidad den curazon di su pue-

blo. Un pueblo pa kende el a sacrificá su bida pa su bienestar. E sostén ricibí e dia aki a duné e apoyo moral pa sigui dilanti y busca husticia pa su país.

Su esfuerzonan, luchando contra hopi contratiempo, contra hopi enemigo bao di su propio pueblo, por fin a bin concretisá na 1983 ora cu durante conferencia di mesa rondo, Aruba a bin logra su Status Aparte.

INHUSTICIA

E soño di nos lidernan político y tambe di e pueblo di Aruba a bira realidad ora cu na 1986 e Status Aparte a drenta na vigor. Nos dia nacional den tur sentido ta un dia riba cual difunto Betico Croes ta ser recordá mas cu nunca, ya cu su determinacion a cambia destino di e país aki.

Historia sinembargo a bolbe ripití ora cu na introduccion di Status Aparte na 1986, pueblo a dicidí pa un otro gobernacion y asina



Betico no por a bira nos promé Promé Minister. Algun dia despues un accidente di auto ta iniciá un segundo lucha pa su persona cual e biaha aki sí, e no ta logra na sali como vencedor. Su morto a sirbi pa un f e pueblo mas ainda y a duna un toque special na e dia di Himno y Bandera.

Cu awe Aruba ta confrontando un situacion otro y no mucho agradabel, tin di haber cu fracaso di esnan cu a "piki" e bandera. Algun tratando na imitá su imagen y otronan forzando pa pone hende lubidá su logronan, a pone e Status Aparte na peliger.

TOQUE SPECIAL

E celebracion di dia di Himno y Bandera e aña aki mester haña un otro nificacion y e mester ta inicio di un

otro lucha. Un lucha na unda mester convencé Hulanda cu nos país ta capaz na produci gobernantenan capaz cu ta cumpli cu normanan di decencia y cu por hiba un maneho ehemplar na bienestar di e pueblo di Aruba.

E lucha e biaha aki concocé enemigo únicamnte den nos propio seno, caminda mal maneho a pone na peliger e ideal cu Betico y su pueblo semper a lucha pe. Ta bai costa hopi pa salba e ideal aki pero e ta posibel. E dia di himno y bandera di e aña aki, mester bira un dia di union caminda gobernantenan mester realizá nan mes cu e mihor forma pa enfrentá e lucha colosal cu tin nos dilanti, ta pa medio di un comision nacional cu por prepará un programa adecuado pa enfrentá e crisis grandi aki. □